



Broj: 01/5-50-1-6-18/08
Sarajevo, 3.7.2008.godine

Z A P I S N I K
18. sjednice Komisije za saobraćaj i komunikacije,
održane 3.7.2008. godine

Sjednica je održana 3.7.2008., s početkom u 14,45 sati.

Sjednici su prisustvovali članovi Komisije:

- | | |
|----------------------------------|---------------------|
| 1. Branko Dokić, predsjedavajući | 6. Snježana Rajilić |
| 2. Šemsudin Mehmedović | 7. Husein Nanić |
| 3. Slavko Matić | 8. Selim Bešliagić |
| 4. Sadik Bahtić | |
| 5. Mehmed Suljkanović | |

Opravdano je odsustvovao Savo Erić.

Iz Ministarstva komunikacija i prometa BiH sjednici su prisustvovali: Nikola Šego, sekretar Ministarstva, Kojo Koprivica, pomoćnik ministra, i Đorđe Ratkovic, generalni direktor Direkcije za civilno zrakoplovstvo BiH.

Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući je predložio sljedeći

D N E V N I R E D

1. Usvajanje Zapisnika 17. sjednice Komisije;
2. Prijedlog zakona o javnim putevima, predlažać: Vijeće ministara BiH (prva komisijska faza);
3. Razmatranje amandmana na zaključke Komisije za saobraćaj i komunikacije Predstavničkog doma povodom rasprave o poslovanju Javnog RTV servisa BiH i mjerama za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu (rasprava na 8. plenarnoj sjednici);
4. Informacija Ministarstva komunikacija i prometa BiH o realizaciji Strategije upravljanja zračnim saobraćajem u Bosni i Hercegovini;
5. Tekuća pitanja:
 - a) Obavještenje Regulatorne agencije za komunikacije BiH u vezi sa zahtjevom Upravnog odbora Javnog RTV sistema BiH za povećanje RTV takse;
 - b) Izvještaj Regulatorne agencije za komunikacije BiH s ekspertne radionice u vezi s nezavisnošću regulatornih tijela u oblasti medija i telekomunikacija.

Dnevni red jednoglasno je usvojen.

Ad. 1.

Zapisnik 17. sjednice Komisije jednoglasno je usvojen, bez primjedbi.

Ad. 2.

Predsjedavajući je pozvao predstavnike Ministarstva komunikacija i prometa BiH da daju uvodnu riječ o Prijedlogu zakona o javnim putevima (u daljnjem tekstu: Prijedlog zakona).

Kojo Koprivica je, obrazlažući Prijedlog zakona, ukazao da je Vijeće ministara BiH, na sjednici održanoj 13.marta 2008., prvi put razmatralo Prijedlog zakona i da je tom prilikom konstatirano da je potrebno usaglasiti sporne odredbe, pa je s tim ciljem osnovana radna grupa u kojoj su bili predstavnici entitetskih ministarstava i državnog ministarstva, koja je, po njegovom mišljenju, kvalitetno radila. Prijedlogom zakona predviđa se osnivanje Agencije za javne puteve BiH koja ima obavezu da priprema i izrađuje studijsku i projektnu dokumentaciju za autoputeve, da usklađuje tehničke standarde i naknade za korištenje autoputeva. Inspekcijski nadzor nad provođenjem ovog zakona, u okviru nadležnosti Agencije, obavlja inspektor za puteve Ministarstva komunikacija i prometa BiH, a u ostalom dijelu Zakona nadležna su inspekcijska tijela za puteve Federacije BiH, Republike Srpske i kantona.

Nikola Šego istakao je da je Prijedlog zakona sačinjen uz mnogo kompromisa kako bi se ipak došlo do zadovoljavajućeg rješenja, kao i da je postignut konsenzus o nadležnosti Agencije za izradu projektne dokumentacije za autoputeve, jer se na taj način lakše ostvaruju kontakti s međunarodnim finansijskim institucijama.

Selim Bešliagić postavio je pitanje da li je Prijedlog zakona usaglašen s vladama entiteta, odnosno nadležnim entitetskim ministarstvima.

Nikola Šego odgovorio je da je, nakon što je Vijeće ministara BiH dalo primjedbe na raniji prijedlog zakona, formirana radna grupa za izradu Prijedloga zakona u koju su imenovani i predstavnici entitetskih ministarstva, koji su aktivno učestvovali u radu, te stoga smatra da postoji saglasnost entiteta u pogledu Prijedloga zakona.

Predsjedavajući je ukazao da mu je poznato da je Vlada Republike Srpske dala primjedbe na Prijedlog zakona jer nisu uvažene primjedbe njihovih članova radne grupe, ali pošto se Prijedlog zakona razmatra u prvog fazi, potrebno je da se Komisija izjasni samo o principima Prijedloga zakona.

Nakon provedene opće rasprave, Komisija je, sa sedam glasova “za“ i jednim „suzdržanim“, podržala principe Prijedloga zakona o javnim putevima.

Ad. 3.

Konstatirano je da su amandmane na zaključke Komisije na 31. sjednici Predstavničkog doma uložili poslanici: Velimir Jukić, Azra Hadžiahmetović i Šefik Džaferović. Prije rasprave o amandmanima, Snježana Rajilić uložila je amandman koji je, u ime Kluba SNSD-a, na 31. sjednici usmeno predložio predsjedavajući Kluba Drago Kalabić, pa je Komisija prihvatila da se razmatra i ovaj amandman.

Predsjedavajući je podsjetio da je na 31. sjednici Predstavničkog doma usvojen zaključak da se odgodi glasanje o zaključcima Komisije, te da Komisija, uzimajući u obzir predložene amandmane, pokuša naći rješenje i kompromis. Mišljenja je da treba razmatrati i eventualno prihvatiti one amandmane koji su u skladu s tačkom 8. plenarne sjednice.

Slavko Matić smatra da je opravdan amandman koji je predložio poslanik Velimir Jukić i da su zakonska rješenja koja se odnose na javne emitere jedan od uzroka njihovog lošeg poslovanja, te da je ovaj amandman apsolutno u skladu s raspravom na plenarnoj sjednici.

Snježana Rajilić podržala je amandman Velimira Jukića i istakla da je očigledno da postoje značajni problemi u funkcioniranju Javnog RTV sistema BiH i Javnog RTV servisa BiH, te da je najbolje rješenje da izmjene ovih zakona pripremi Vijeće ministara BiH.

Husein Nanić smatra da predloženi amandman izlazi iz konteksta tačke plenarne sjednice i da njegovo usvajanje ne bi bilo korisno.

Nakon rasprave o amandmanima, Komisija je usvojila amandmane koji glase:

Amandman I. (Šefik Džaferović)

U zaključku 2. riječi: „na jezicima sva tri konstitutivna naroda“ zamjenjuju se riječima: „na jezicima koji su u službenoj upotrebi“.

(usvojen sa sedam glasova „za“ i jednim „suzdržanim“)

Amandman II. (Azra Hadžiahmetović)

U zaključku 7. riječi: „upravnih odbora Javnog RTV sistema“ zamjenjuju se riječima: „Upravnog odbora Javnog RTV sistema“.

(usvojen jednoglasno)

Amandman III. (Klub SNSD-a)

Zaključak 8. mijenja se i glasi:

„Predstavnički dom Parlamentarne skupštine BiH zahtijeva od Upravnog odbora i rukovodstva BHRT-a hitne unutrašnje i finansijske, tehnološke, kadrovske i programske reforme koje bi se provele prije uspostavljanja Korporacije javnih RTV servisa, u skladu s Planom restrukturiranja iz 2004. godine, Zakonom o Javnom RTV servisu BiH i drugim mogućnostima koje stoje na raspolaganju, a u skladu sa standardima i preporukama Evropske unije“.

(usvojen sa šest glasova „za“ i dva „protiv“)

Amandman IV. (Azra Hadžiahmetović)

U dopunskom zaključku 2. riječi: „usvoje dokumente za zaštitu javnih servisa od neuređenih i monopolističkih odnosa na marketinškom tržištu“ zamjenjuju se riječima: „preduzmu sve radnje u skladu s postojećim zakonima s ciljem osiguranja adekvatnih uslova na tržištu marketinških usluga“.

(usvojen jednoglasno)

Ostali amandmani koje su podnijeli Azra Hadžiahmetović i Velimir Jukić nisu dobili potrebnu većinu glasova prisutnih članova Komisije.

Komisija za saobraćaj i komunikacije jednoglasno je prihvatila zaključke sa usvojenim amandmanima, pa predlaže Predstavničkom domu usvajanje sljedećih zaključaka:

1. Predstavnički dom Parlamentarne skupštine BiH informiran je o sadržaju dokumenta "Stanje i plan konsolidacije poslovanja BHRT-a", te zadužuje Upravni odbor BHRT-a da u trećem kvartalu 2008. godine dostavi Parlamentarnoj skupštini BiH izvještaj o efektima preduzetih mjera u vezi s revizorskim izvještajima i o programu mjera za dugoročnu finansijsku stabilizaciju BHRT-a.
2. Predstavnički dom Parlamentarne skupštine BiH zalaže se za zakonito i stabilno poslovanje BHRT-a i snažno podržava istinito, potpuno, nepristrasno, pravedno i blagovremeno informiranje javnosti o svim događajima u Bosni i Hercegovini te za ostvarivanje prava na informiranje javnosti, ravnopravno na jezicima koji su u službenoj upotrebi u Bosni i Hercegovini u skladu s međunarodnim i evropskim propisima i standardima, kao i odredbama Ustava BiH.

3. Predstavnički dom Parlamentarne skupštine BiH traži od Upravnog odbora Javnog RTV sistema BiH, kao i Upravnog odbora i rukovodstva BHRT-a da iskoriste sve zakonske mogućnosti da od entitetskih emitera naplate potraživanja BHRT-a po svim osnovama.
4. Predstavnički dom Parlamentarne skupštine BiH traži od Vijeća ministara BiH da nastavi plaćati zakup satelita i da interventno osigura sredstva za potrebe Javnog RTV sistema BiH na osnovu članstva u međunarodnim asocijacijama.
5. Predstavnički dom Parlamentarne skupštine BiH zahtijeva da Upravni odbor i rukovodstvo BHRT-a racionaliziraju poslovanje i iskoriste sve unutrašnje rezerve koje mogu dovesti do finansijske konsolidacije, te da se provedu sve preporuke Ureda za reviziju institucija BiH.
6. Predstavnički dom Parlamentarne skupštine BiH daje punu podršku tehničko-tehnološkoj obnovi Javnog RTV sistema BiH i poziva nadležne institucije u Bosni i Hercegovini da mu pomognu u procesu prelaska s analogne na digitalnu televiziju.
7. Predstavnički dom Parlamentarne skupštine BiH traži od Upravnog odbora Javnog RTV sistema BiH i Upravnog odbora BHRT-a da, u skladu sa ustavnim odredbom o konstitutivnosti naroda i ravnopravnosti Srba, Hrvata, Bošnjaka i ostalih u Bosni i Hercegovini, što prije predloži program mjera za uspostavljanje izbalansirane nacionalne zastupljenosti rukovodećeg, uredničkog i novinarskog kadra u cjelokupnom Javnom RTV sistemu BiH.
8. Predstavnički dom Parlamentarne skupštine BiH zahtijeva od Upravnog odbora i rukovodstva BHRT-a hitne unutrašnje i finansijske, tehnološke, kadrovske i programske reforme koje bi se provele prije uspostavljanja Korporacije javnih RTV servisa, u skladu s Planom restrukturiranja iz 2004. godine, Zakonom o Javnom RTV servisu BiH i drugim mogućnostima koje stoje na raspolaganju, a u skladu sa standardima i preporukama Evropske unije.

Osim navedenih zaključaka koji su prihvaćeni na osnovu predloženih zaključaka 8. zajedničke sjednice, Komisija je utvrdila i usvojila zaključke koji proizilaze iz rasprave na zajedničkoj sjednici, te ih upućuje Predstavničkom domu na usvajanje:

1. Idući ususret uspostavljanju Korporacije, zadužuju se Upravni odbor BHRT-a i Upravni odbor Javnog RTV sistema BiH da, u skladu s čl. 12. i 29. Zakona o Javnom RTV sistemu BiH, definiraju organizacionu, tehnološku i proizvodnu ulogu organizacionih jedinica u Sarajevu, Banjoj Luci i Mostaru te broj zaposlenih u svakoj od njih.
2. Zaduju se Upravni odbor BHRT-a i Upravni odbor Javnog RTV sistema BiH da, najkasnije do kraja jula 2008.godine, preduzmu sve radnje u skladu s postojećim zakonima s ciljem osiguranja adekvatnih uslova na tržištu marketinških usluga Bosne i Hercegovine i da Upravni odbor BHRT-a o tome informira Predstavnički dom Parlamentarne skupštine BiH najkasnije do kraja augusta 2008.godine.

U smislu odredbi člana 39. i 113. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenovan je predsjedavajući Komisije Branko Dokić.

Ad. 4.

Predsjedavajući je pozvao generalnog direktora Direkcije za civilno zrakoplovstvo BiH da ukratko upozna prisutne s Informacijom o realizaciji Strategije upravljanja zračnim saobraćajem u Bosni i Hercegovini (u daljnjem tekstu: ATM Strategija).

Dorđe Ratkovića istakao je da je Informacija o realizaciji ATM strategije usvojena na 44. sjednici Vijeća ministara BiH, održanoj 10.4.2008., i da sadrži detaljan pregled svih aktivnosti od oktobra 2005. godine kada je usvojena ATM strategija. Dva su ključna problema s kojima se u realizaciji ATM strategije susreće Direkcija za civilno zrakoplovstvo i to prije svega nedostatak finansijskih sredstava za nabavku i instaliranje opreme za Sistem upravljanja zračnim saobraćajem BiH i izgradnju i osposobljavanje građevinskih objekata gdje će biti instalirana ta oprema. Drugi problem vezan je za izmjene Zakona o civilnom zrakoplovstvu

Bosne i Hercegovine, kao i donošenje Zakona o osnivanju pružaoca usluga u zračnoj plovidbi. Postoji saglasnost o potrebnim izmjenama Zakona o civilnom zrakoplovstvu, dok i dalje ostaje otvoreno pitanje Zakona osnivanju pružaoca usluga u zračnoj plovidbi, zbog činjenice da nije postignuta saglasnost između članova Komisije koja radi na pripremi Prijedloga zakona. Naglasio je da je odlukom Vijeća ministara BiH određeno da je sjedište Direkcija za civilno zrakoplovstvo u Banjoj Luci, a sjedište pružaoca usluga u zračnoj plovidbi u Mostaru.

Predsjedavajući je ukazao da je ATM strategija donesena uz podršku EUROCONTROL-a, kao i da su pružili finansijsku i tehničku podršku realizaciji Strategije. Istakao je važnost bržeg rješavanja svih poteškoća koje onemogućavaju da domaće institucije u potpunosti preuzmu kontrolu zračnog saobraćaja iznad teritorije Bosne i Hercegovine. Mišljenja je da bi se izmjenama Zakona o civilnom zrakoplovstvu trebalo omogućiti da se odlukom Vijeća ministara BiH osnuje Služba za kontrolu zračnog saobraćaja u Bosni i Hercegovini.

Komisija je primila k znanju Informaciju o realizaciji ATM strategije BiH, te usvojila sljedeći zaključak:

Komisija smatra da je potrebno da predsjedavajući Komisije i ministar komunikacija i prometa BiH održe radni sastanak na kojem bi zajednički razmotrili mogućnosti za bržu realizaciju Strategije upravljanja zračnim saobraćajem u Bosni i Hercegovini, pogotovo u dijelu koji se odnosi na uspostavljanje službe za kontrolu zračnog saobraćaja.

Ad. 5.

a) Komisija je primila k znanju obavještenje Regulatorne agencije za komunikacije BiH u vezi sa zahtjevom Upravnog odbora Javnog RTV sistema BiH za povećanje RTV takse.

b) Komisija je primila k znanju Izvještaj Regulatorne agencije za komunikacije BiH s ekspertne radionice u vezi s nezavisnošću regulatornih tijela u oblasti medija i telekomunikacija.

Predsjedavajući je ukazao da je Kolegij Predstavničkog doma dostavio Komisiji na postupanje dopis Upravnog odbora BHRT-a u vezi s naknadom članovima Upravnog odbora, te predložio da Komisija zatraži od Ministarstva komunikacija i prometa BiH mišljenje o zahtjevu Upravnog odbora BHRT-a. Prijedlog je prihvaćen jednoglasno.

Na prijedlog Šemsudina Mehmedovića, Komisija je usvojila sljedeći zaključak:

Traži se od Ministarstva komunikacija i prometa BiH da se prvom zamjeniku predsjedavajućeg Komisije Šemsudin Mehmedoviću dostavi poziv za učešće na nastavku stručne rasprave temi: „Položaj trase autoputa na Koridor Vc u širem području Počitelja“.

Kako nije bilo drugih pitanja, predsjedavajući je zaključio sjednicu u 16,05 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić